

ԿՐՕՆԱԿԱՆ—ԲԱՐՈՅԱԿԱՆ

ԲԵԹՂԵՀԷՄԻ ԱՍՏՂԸ.

«Եւ երբ որ Յիսուս ծնունց Բեթղեհէմում, ահա մոզեր եկան արեւելքից և ասացին, տեսանք նրա աստղը արեւելքում և եկանք երկրպագել նրան: Եւ ահա այն աստղը, որ տեսան արեւելքում, նրանց առաջից գնում էր և եկաւ այն տեղի վրայ կանգնեց, ուր էր մանուկը: Եւ երբ որ նրանք տեսան այն աստղը՝ մեծ ուրախութիւնով ուրախացան շատ: Մատ. Բ. 1—11:

Ի՛նչ զմայլելի հակադրութիւնների գեղեցիկ մի ամբողջութիւն, մի համերգ ենք դիտում մենք Բեթղեհէմում՝ Քրիստոսի ծննդեան ժամին. աշխարհի Փրկիչը ծնւում է, բայց նա մարդավայել իջեալութեամբ մի տեղ չունի, նրան վիճակուել է անասունների մի քարայր և նորածին յաւիտենական Թագաւորը խանձարութեամբ պատած դրուել է մուրի մէջ, սակայն այդտեղ եկել են նրան երկրպագելու Թագաւորներ, իմաստուններ, այնտեղ նրան մատուցանում են ոսկեղէն, Թանգազին ընծաներ: Միւս կողմից հասարակ պարզ հովիւներն են նրան ողջունում. վերելից հնչում է երկնային երգեհոնը, փառահեղ, լուսապարար հրեշտակների ցնծութեան երգը և փառաբանութիւնը, իսկ այդ ամենի վրայ երկնակամարից ցոլում է փայլուն, դիւթիչ և գրաւիչ պայծառ աստղը, Բեթղեհէմի անանց, չնաշխարհիկ աւետարերը:

Բոլորը գեղեցիկ, բոլորը խորհրդաւոր, բոլորն ուսանելի և կրթիչ, այստեղ երկինքը միացած է երեւում երկրի հետ, այդտեղ ծագում է նոր կեանքի հաւատը, յոյսը, այստեղ փթթում են աշխարհում դեռ չը լսուած նոր առաքինութիւնների ծաղիկները՝ խոնարհութիւն և

հեղութիւնը, ինչպէս ասում է, «եւ որի մէջ կը բնակուիմ, եթէ ոչ հեղերի և խոնարհների մէջ»:

Բեթղեհէմի աստղը թող լինի մի նշանաբան յիշեցնող մեր կեանքի կէտնպատակը, մեզ ոգևորող, մեր միտքը լուսաւորող, մեզ միշտ ի Գրիստոս արթուն պահող նշանաբանը: Նրանով կը յիշենք ճաճանչափայլ մարդը, մարդկութեան նոր ծնած արեգակ Փրկիչը, արևելեան մոգերի փառահեղ երկրպագութիւնը, զիշերապահ հովիւների զմայլանքը, երբ նրանք տեսան զուարթուն հրեշտակների լուսաշաղախ գունդերը երգելիս, «Փառք բարձրերում Աստծուն», երկրի վրայ խաղաղութիւն, մարդկանց մէջ իրար հետ սէր բարեհաճութիւն»:

Ս. Աւետարանի մէջ նկարագրուած ամեն մի դէպք և ամեն մի խօսք պիտի խոր, անջնջելի տպաւորութիւն գործէ մեր վրայ, որ մենք ամբողջովին համակուենք նրանով և ամբողջապէս լուսաւորուենք, ոչ մի մութ կէտ չը մնայ մեզանում: Ս. Աւետարանի անգին մարգարիտները յումպէտս չը պիտի մնան, այլ պիտի մեզ պճնեն և զարգարեն. սուրբ Փրկչի հոգեզմայլ ծնունդը իւր հրաշագեղ տեսարաններով, Փրկչի երկրաւոր կեանքի յաղթանակը, քարոզութիւնների, բժշկութիւնների, սրտատուտ խաչի, փառաւորագունդ յարութեան, վեհագոյն համբարձման բոլոր մանրամասնութիւնները պիտի մեզ քաջ ծանօթ և ընտանի լինեն, վասն զի արժան և վայել է, որ քրիստոնեան կատարեալ քրիստոնեայ լինի և ոչ թէ թերակատար կամ անուանական:

Երբ մենք միշտ յիշենք Բեթղեհէմի աստղը, նրա հետեող բոլոր անցքերը, և իրողութիւններն էլ շղթայի պէս կը բացուեն մեր հոգեւոր տեսութեան առջ ծաւալադիտակի նման, մեզ կը զմայլեցնեն, մեզ կը կրթեն և մեր վրայ կը կատարուի Փրկչի գալստեան համայն մարդկութեան աստուածարման խորհուրդը:

Նիկողայոս վրդ. Տ. Աւետիսեան